



REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE MARA

Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.

Festa de Santa Luxia in Mara – Su 13 de Mesi de Idas de su 2022

Su 13 de su Mesi de Idas in Mara s'est afestada Santa Luxia.

Custa Santa est intèndia meda in sa bidida, difatis a custa est intregada fintzas una cresiedda fabricada in su 600.

In antigòriu custa crèsia fiat stètia pesada in su sartu, oi imbecis s'agatat ingiriada de is domus po mori de s'amaniadura de sa bidida. Aintru de sa crèsia est presenti sa stàtua antiga de sa santa, de custa perou abarrat su truncu sceti poita totu s'atru iat pigau fogu.

Precèdia de diis de preghiera, sa dii de su 13 de su Mesi de Idas est arrica meda de acuntessimentus. Sa stàtua est presenti giai antru de sa cresiedda cosa sua e ingunis abetat su vicàriu chi arribit in prucezioni cun is obrerias e is stendardus insorus. Pustis de s'intrada in sa cresiedda e sa beneditzioni s'apariciat totu po s'incumentzu de sa prucezioni po is bias de sa bidida.

Una borta posta sa stàtua in pitzus de su carru tragau de is bois, sa santa incumentzat su biaxi suu chi dd'at a lompì a sa crèsia parrochiali.

In s'interis de sa prucezioni po Santa Luxia benint allutus is fogadonis chi funt sìmbulus de luxi e duncas de sa Santa e totu, custus fogus benint cuncordaus po devotzioni de is fidelis chi bivint in is bixinaus innui passat sa santa.

Candu lompit sa prucezioni a sa crèsia parrochiali si narat sa missa. A s'acabu de sa missa sa Santa lassat sa crèsia parrochiali e incumentzat su biaxi po sa cresiedda sua ingorta a coddu de is fidelis. In sa cresiedda benit arricia de unu fogadoni mannu meda chi benit allutu in mesu de sa pratza chi est apalas de sa cresiedda, custu fogadoni est benedixu de su vicàriu.

Is fogus e is guetus ponit s'acabu a sa festa.

S'obreria fata de fèminas, si incurat chi totu sa festa siat apariciada beni e in s'interis de sa prucezioni acumpàngiat a Santa Luxia cun is stiàricas alutas in is manus.